



**Amahame ngengamyitwarire y'umwuga w'itangazamakuru
mu Rwanda.**

Yavuguruwe kandi yemezwa ku itariki ya 5 Mata 2014

Kigali-Rwanda

IJAMBO RY'IBANZE

Kumurikira rubanda ni inkingi y'ubutabera, ubwigenge, n'ubwisanzure bikaba n'umusingi wa demokarasi. Ni n'ipfundu ry'amahoro arambye, iterambere n'umutekano.

Ni yo mpamvu ubwisanzure bw'itangazamakuru bwahawe umwanya ukomeye mu itangazo mpuzamahanga ryerekeye uburenganzira bwa muntu, mu masezerano mpuzamahanga yerekeye uburenganzira bwa Muntu mu by'Imbonezamubano na Politiki, mu masezerano Nyafurika y'Uburenganzira bwa Muntu n'ubw' Abaturage no mu itegeko nshinga rya repubulika y'u Rwanda ryo mu 2003 nk'uko ryavuguruwe kugeza ubu.

Ni nayo mpamvu inshingano y'umunyamakuru ari mbere na mbere uguharanira izo ntego, ashakisha kandi atangaza ukuri, akagaragaza uko ibantu byagenze mu buryo busobanutse, buboneye, butabogamye kandi bwuzuye.

Abanyamakuru b'umwuga mu byiciro byitangazamakuru bitandukanye bihatira gufasha rubanda kugera ku burenganzira bwabo bwø kumenya mu buryo buhamye kandi bwuje ubunyakuri.

Iyi ntego yubakiye ku bunyangamugayo bw'umunyamakuru ari nabwo shingiro ry'icyizere agirirwa n'ukurindwa kwihariye ateganyirizwa n'amategeko mpuzamahanga n'ay'imbere mu gihugu.

Kugira ngo umunyamakuru n'ibitangazamakuru bakore umurimo wabo mu bwisanzure kandi barengerwe mu buryo bwhariye, bagomba gukora mu buryo bw'umwuga.

Kugira ngo ibi bigerweho, ku isi hose, abanyamakuru baranzwe no kwemeza indangamyitwarire zibagenga mu mwuga wabo. Mu bihugu byinshi, iyo ndangamyitwarire ifatwa nk'amahame shingiro y'itangazamakuru.

Ni ku bw'yo mpamvu, no kubw'icyizere mu itangazamakuru ryigenga, abanyamakuru bo mu Rwanda batekereje gushyiraho iyi ndangamyitwarire, no kuyubahiriza nk'inyandiko rukumbi igenga abanyamwuga bose b'itangazamakuru mu gihugu.

Ku bw'ibyo, iyi ndangamyitwarire si uruhererekane rw'ingingo z'amategeko yo kubahirizwa, ahubwo ni isoko ifasha abanyamwuga mu gufata ibyemezo by'imyitwarire, ikanafasha ihuriro ryabo kwigenzura. Yemewe ku bushake n'abanyamakuru bose bo mu Rwanda, kandi igenewe kwifashishwa mu kazi k'abanyamakuru no mu mashuri yigisha itangazamakuru nk'umuyoboro w'imyitwarire iboneye mu itangazamakuru.

Muri rusange, iyi ndangamyitwarire y'abanyamakuru ntiyari kuboneka, iyo hataboneka inkunga n'ubufasha by'abantu batandukanye, za komisiyo, amashyirahamwe n'abafatanyabikorwa mu iterambere. N'ubwo bose tutabarondora kubera akanya gato, turashimira cyane Rwanda Media Commission (RMC), ishyirahamwe ry'abanyamakurukazi bo mu Rwanda (ARFEM) Ishyirahamwe ry'abanyamakuru bo mu Rwanda (ARJ) n'ihuriro ry'abanditsi bakuru bo mu Rwanda (REFO); kuko iyo badatanga inkunga yabo iyi ndangamyitwarire ntiba yaragezweho.

Turashimira kandi *Article 19*, yateye inkunga kuvugurura no guhuza iyi ndangamyitwarire n'amahame y'ukwigenzura kw'itangazamakuru; USAID na *Millennium Challenge Corporation* (MCC), umushinga wa IREX uteza imbere itangazamakuru ryo mu Rwanda, ku nkunga bateye mu gutegura iyandikwa ry'umwimerere n'icapwa ry'iyi ndangamyitwarire; turanashimira Bwana Nsabimana Innocent, umunyamakuru w'inararibonye w'umurundi watanze ibitekerezo by'ingenzi mu gutegura umwimerere w'iyi ndangamyitwarire yavuguruwe no mu kuyihuza n'amahame y'ukwigenzura kw'itangazamakuru.

Dusoza, turashimira Dr Christopher Kayumba, umugishwanama ukorera muri MGC Consult International Ltd na Bwana Joseph Njuguna, umuyobozi w'ishuri ry'itangazamakuru n'itumanaho rya kaminuza y'u Rwanda kuba barakosoye kandi bagahuza iyi ndangamyitwarire n'inshingano za Rwanda Media Commission (RMC).

Umuyobozi wa RMC, Fred MUVUNYI



Iriburiro

Twebwe, abanyamakuru bo mu Rwanda,

Tumaze kwiyumvisha ko gusakaza amakuru nta nzitizi ari inkingi y'ubwisanzure, demokarasi, iterambere n'umutekano;

Dushingiye ku Itangazo Mpuzamahanga ku Burenganzira bwa Muntu u Rwanda rwashyizeho umukono;

Tumaze kubona ko ubwisanzure mu gutanga ibitekerezo, mu kugaragaza uko wumva ibantu, mu kugaragaza icyo umutimanama w'umuntu wemera n'ubwitangazamakuru buteganijwe kandi bushyigikiwe n'itegeko Nshinga rya Republika yuRwanda ryo muri Kamena 2003 nk'uko ryavuguruwe kugeza ubu'

Dushingiye ku ruhare itangazamakuru rigira mu imibanire y'abantu, ubukungu no mu buzima bwa politiki ;

Dushingiye ku mateka y'umuryango nyarwanda n'itangazamakuru ryawo;

Turebye ukwaguka kw'urubuga rw'itangazamakuru n'imikorere yaryo mu gihugu,

Twitaye ku nshingano za Rwanda Media Commission, urwego rwashyizweho natwe kandi ku bwacu, no ku nyungu z'itangazamakuru n'umwuga wo gutangaza amakuru;

Hagamijwe Kurinda intego y'indangamyitwarire, no kugengwa n'ingingo zayo mu gukemura no kurangiza bwangu ibibazo by'imyitwarire mibi yerekeye umwuga w'itangazamakuru n'abanyamakuru,

Dusubiye ku mahame ndangamyitwarire agenga abanyamakuru, abandi banyamwuga b'itangazamakuru n'umwuga w'itangazamakuru mu Rwanda yo muri Kamena 2011".

Twemeje iyi ndangamyitwarire, yerekana inshingano n'uburenganzira by'umunyamakuru mu Rwanda. Hirya y'ibi, Rwanda Media Commission

yemejwe bidasubirwaho nk'urwego rukumbi rushinzwe ukwigenzura kw'itangazamakuru, rusobanura kandi rugashyira mu bikorwa iyi ndangamyitwarire mu izina ry'abanyamakuru.

Ikora ubukemurampaka mu buryo butabogamye kandi bwihuse, ku birego bishingiye cyangwa biturutse mu ishyirwa mu bikorwa ry'iyi ndangamyitwarire byerekeye abanyamakuru bose babyemerewe kandi bafite ikarita y'umwuga n'abandi banyamwuga b'itangazamakuru.

UMUTWE WA MBERE: INSHINGANO Z'ABANYAMAKURU

Mu kazi kabu ko gutara amakuru, kuyatunganya, no kuyatangaza, abanyamakuru bafite inshingano zikurikira :

INGINGO YA MBERE 1: Guharanira indangagaciro mpuzamahanga

Umunyamakuru agomba guharanira indangagaciro mpuzamahanga z'amahoro, ubworohere, demokarasi, uburenganzira bwa muntu, iterambere rishingiye ku mibereho myiza y'abaturage n'ubusabane bw'abanyagihugu buha agaciro buri muturage, nk'uko biteganywa mu Itangazo Mpuzamahanga ku Burenganzira bwa Muntu.

INGINGO YA 2: Ubunyangamugayo no guharanira ukuri

Umunyamakuru yirinda ibinyoma. Afite inshingano yo gutangaza uko ibantu byagenze, agashakisha ukuri, kandi azirikana ko rubanda rufite uburenganzira bwo guhabwa amakuru y'impamo. Ntakwiye kwirengagiza amakuru y'ingenzi cyangwa ngo ahindure amagambo yavuzwe, cyangwa inyandiko izo arizo zose.

Agomba kumenya ko guharabika, gutukana, gusebanya no gushinja ibinyoma yaba abantu, amatsinda, amasosiyete y'ubucuruzi, amashyirahamwe, imiryango cyangwa ibihugu ari amakosa akomeye y'umwuga.

INGINGO YA 3: Inshingano kuri rubanda

Umunyamakuru agomba kuzirikana inshingano ye kuri rubanda.

Kubera iyo mpamvu, agomba gutangaza cyangwa kwandika amakuru ari uko yamenye aho yaturutse, ko ari ukuri kandi yuzuye. Igihe harimo ugushidikanya na guke agomba kureka kuyatangaza cyangwa akigengesera, akurikije uburyo buteganywa n'umwuga w'itangazamakuru.

INGINGO YA 4: Kubiba urwango

Umunyamakuru yirinda gutangaza cyangwa kwandika amakuru abogamye cyangwa abiba urwango rushingiye ku ibara ry'uruhi, ku miryango, ku moko, ku idini, ku gitsina, ku myaka y'ubukure, ku mibereho, ku bumuga, ku indwara z'ibyorezo, cyangwa indi mimerere y'ubuzima n'ibindi bishobora gushingirwaho mu kuvangura abantu. Ibyo byemerwa gusa iyo kuvuga iyo miterere y'umuntu bifasha mu gushakisha ukuri kandi biri mu nyungu za rubanda. Agomba kwirinda ivangura iryo ari ryo ryose.

INGINGO YA 5: Gukosora gusubiza no kugorora inkuru

Inkuru itari yo yatangajwe cyangwa yanditswe igomba guhita ikosorwa bwangu. Abantu ku gitu cyabo cyangwa imiryango, bafite uburenganzira bwo gusubiza n'ubwo kubeshyuza mu buryo buteganyijwe n'amategeko.

Abanditse cyangwa abatangaje amakuru cyangwa igitekerezo bigaragajwe ko atari ukuri, basabwe kwisegura bakabikora batangaza cyangwa bandika bwangu inyandiko ivuguruza, ikosora cyangwa itanga ibisobanuro kandi igasohorwa mu buryo busa n'ubwari bwakoreshejwe ku nkuru yanenzwe.

INGINGO YA 6: Kubahiriza ubuzima bwite bw'umuntu n'agaciro ke

Umunyamakuru agomba kubahiriza agaciro ka muntu n'ubuzima bwite bwe. Inkuru ku buzima bwite bw'umuntu ishobora gutangazwa gusa ku nyungu za rubanda.

Umunyamakuru ntakwiye kwinjira mu buzima bwite bw'abantu ashingiye ku ntege nke zabo nk'abana, abashaje, abafite ubumuga, abari mu gahinda cyangwa undi wese wasigajwe inyuma cyangwa imyiryango yabo.

INGINGO YA 7: Ubushishozi ku makuru agaragaramo, ubugizi bwa nabi n'urukozasoni

Umunyamakuru agomba kwirinda gutangaza amakuru ashishikariza ubugizi bwa nabi, cyangwa inkuru z'urukozasoni, ashishikariza urugomo cyangwa ibindi bikorwa binyuranye n'amategeko.

INGINGO YA 8: Kurengera abana n'abakorewe ihohoterwa rishingiye ku gitsina

Umunyamakuru agomba gushisha no kwigengesera iyo atunganya inkuru irebana n'ihohoterwa rishingiye ku gitsina, n'aban bataruzuza imyaka 18 y'amavuko.

Birinda kugaragaza amazina y'abahohotewe baba ari abana cyangwa ari abakuze, bakigengesera kugaragaza amashusho n'amafoto y'abo cyangwa gutanga ubundi busobanuro bushobora gutuma bamenyekana, keretse iyo bikozwe hagamijwe kurengera inyungu z'abahohotewe.

Birinda kandi kugaragaza abakorewe ihohoterwa rishingiye ku gitsina keretse iyo ba nyir'ubwite bujuje imyaka y'ubukure babyiyemereye nyuma yo gusobanurirwa ingaruka zaturuka ku gutangaza aya makuru.

Gutangaza amashusho y'urukozasoni y'abana birabujije. Muri iyi ndangamyitwarire, "amashusho y'urukozasoni y'abana" bisobanuye "Ishusho iyo ari yo yose cyangwa insobanuro z'umuntu, uraho cyangwa wihimbiwe, ufite cyangwa usobanurwa nk'utagejeje imyaka 18 y'amavuko, akora ibikorwa bishingiye ku gitsina, cyangwa agaragaza, cyangwa asobanura umubiri w'umuntu cyangwa ibice biwugize, mu buryo cyangwa imimerere iganisha ku gushora mu mibonano mpuzabitsina igamije indonke; cyangwa mu buryo bushobora kwifashishwa mu nyungu zo gushora mu mibonano mpuzabitsina igamije indonke.

INGINGO YA 9: Ishema ry'umwuga n'ubunyangamugayo.

Usibye igihe bigaragara ko ari ngombwa, umunyamakuru agomba kwirinda gukoresha inzira zififitse kugira ngo abone amakuru, amafoto cyangwa amashusho.

Yirinda kwakira indonke y'amafaranga cyangwa indi ishobora gutangwa n'abantu bifuza ko inkuru ibogamira aho bashaka; bityo bikaba byabangamira ubunyangamugayo mu mwuga n'ishema ry'umunyamakuru.

INGINGO YA 10 : Ubwigenge

Umunyamakuru arwanya igitutu, kigamije gutuma ahindura inkuru cyangwa ayivuga uko itari, cyaba giturutse k'uwo bakorana cyangwa uwo hanze. Yemera gusa amabwiriza yerekeye imitunganirizwe y'inkuru ahabwa n'abamukuriye mu kazi, kandi yirengera bidasubirwaho ibyo yanditse n'ibyo yatangaje hakurikijwe amategeko agenga itangazamakuru.

INGINGO YA 11: Umutwe w'inkuru n'amafoto bishitura, kandi birimo amakabyankuru

Umunyamakuru yirinda imitwe y'inkuru ishitura, irimo amakabyankuru cyangwa idafite aho ihuriye n'ibigize inkuru yatangajwe.

Imitwe n'amagambo asobanura amafoto bigomba kuba bitanga ishusho nyayo y'ibiri muri iyo nkuru cyangwa kuri iyo foto. Ibyapa ntibikwiye kuba biyobya rubanda, ahubwo bikwiye kuba bitanga ishusho nyanyo y'ikivugwaho. Amafoto ntashobora gutanga isura itari yo cyangwa kuyobya cyangwa ngo ahindagurwe kugira ngo akore ibi.

INGINGO YA 12: Ibanga ry'akazi no kutavuga ahaturutse inkuru

Umunyamakuru afite inshingano yo kubika ibanga ry'akazi.

Agomba kuvuga aho yakuye inkuru atangaza . Nyamara, afite inshingano yo kugirira ibanga abifuje ko imyirondoro yabo idatangazwa. Ibi biba ngombwa iyo kugaragaza abo bantu bishobora kubagiraho ingaruka mbi.

INGINGO YA 13: Gutandukanya inkuru n'ibitekerezo bwite by'umunyamakuru

Umunyamakuru afite uburenganzira bwo kwerekana aho ahagaze ku kibazo icyo ari cyo cyose. Afite inshingano zo gutandukanya inkuru n'ibitekerezo bye bwite.

INGINGO YA 14: Guha ijambo abarebwa n'inkuru

Umunyamakuru agomba kuzirkana guha ijambo impande zose zirebwa n'inkuru atangaza, bijyanye n'amahame remezo.

INGINGO YA 15: Kvirinda kwiyitirira inkuru yatawe n'abandi

Umunyamakuru yirinda kwiyitirira inkuru yatawe n'abandi, ahubwo yihatira kubahiriza uburenganzira ku mutungo bwite mu by'ubwenge. Iyo bibaye ngombwa gukoresha inkuru y'undi agomba kuvuga nyirayo kabone n'iyo yaba yatawe na bagenzi be bakorana.

INGINGO YA 16: Ukutabangikanywa kw'imirimo y'itangazamakuru n'ubuvugizi bw'ikigo runaka

Akazi k'abashinzwe itangazamakuru, ak'ubuvugizi bw'ibigo cyangwa indi mirimo ijyanye n'iyi ntibangikanywa n'umwuga w'ubunyamakuru.

INGINGO YA 17: Gutandukanya inkuru n'iyamamaza

Inkuru n'iyamamaza bigomba gutandukanywa. Umunyamakuru ntagomba gushyira amazina ye ku nyandiko zamamaza cyangwa ngo asome ubutumwa bwamamaza atavuze ko arimo kwamamaza.

INGINGO YA 18: Gufata nk'umwere ukurikiranyweho icyaha

Umunyamakuru yubahiriza ihame ry'uko ukurikiranyweho icyaha ari umwere mu gihe inkiko zibifitiye ububasha zitaramuhanya icyaha ku buryo budasubirwaho.

Mugihe batunganya inkuru yerekeye ubutabera, birinda kugaragaza isano iri hagati y'abantu aba n'aba n'umuntu ukekwaho icyaha cyangwa gukomoza k'ubwoko bwe, idini, igitsina, umuryango aturukamo cyangwa inshuti ze, keretse iyo kubivuga bifitiye rubanda inyungu.

Iyo amafoto y'ukekwaho icyaha atangajwe mbere y'uko urubanza rwe rucibwa umunyamakuru wabigizemo uruhare agomba gukurikirana urubanza kugeza rurangiye agatangaza umwanzuro w'inkiko zibifitiye ububasha.

Nyamara, mu gihe ukurikiranweho icyaha ataruzuza imyaka 18 y'amavuko, umunyamakuru yirinda kwerekana amashusho cyangwa amafoto ye.

INGINGO YA 19: Gushyira hamwe

Abanyamakuru bemewe n'amategeko biyemeje gushyira hamwe mu uguharanira no kurengera inyungu z'umwuga wabo muri rusange, n'inyungu za mugenzi wabo by'umwihariko, igithe akurikiranywe n'inzego z'ubutabera cyangwa iz'ubuyobozi biturutse ku inyandiko ze cyangwa amagambo ye yatangaje mu itangazamakuru, mu gihe iyo nyandiko cyangwa amagambo ye bitavuguruzanya n'iyi ndangamyitwarire.

INGINGO YA 20: Ishyirwa mu bikorwa bya aya mahame

Hashingiwe ku ngingo ibanziriza iyi, abamunyamakuru bemeye gukurikiza aya mahame ndangamyitwarire no guhwiturwa bemera n'ibyemezo Rwanda Media Commission urwego rugizwe na bagenzi babo basangiye umwuga rubafatira.

Iyo RMC isanze igitangazamakuru cyararenze kuri iyi ndangamyitwarire ifite ububasha bwo gutegeka igitangazamakuru gusaba imbabazi no gutangaza ako kanya inkuru ikosora ayo makosa. Igihe hagaragaye kurenga nkana kandi ku buryo bukabije ku ngingo zikubiye muri iyi ndangamyitwarire, RMC ishobora guhanisha igitangazamakuru amande cyangwa kugisabira kugihagarika. Umunyamakuru agomba gukora uko ashoboye ngo amenye amategeko n'amabwiriza byerekeye itangazamakuru.

UMUTWE WA KABIRI: UBURENGANZIRA BW'ABANYAMAKURU

Umunyamakuru agomba, mu rwego rw'akazi ke, guharanira uburenganzira bukurikira :

INGINGO YA 21: Guhabwa amakuru nta kiguzi

Nk'uko biteganywa n'itegeko rigenga uburyo bwo guhabwa amakuru, umunyamakuru uri mu kazi, agomba guhabwa amakuru yose kandi afite uburenganzira bwo kugenzura mu bwisanzure ibikorwa byose bigenga ubuzima rusange.

INGINGO YA 22: Kwanga amabwiriza anyuranye n'umurongo w'ikinyamakuru

Umunyamakuru afite uburenganzira bwo kwanga amabwiriza ayo ariyo yose anyuranye n'umurongo igitangazamakuru akorera kigenderaho.

INGINGO YA 23: gukurikiza umutimanama

Mu kazi kabo, abanyamakuru bashobora kwishingikiriza ingingo yerekeye gukurikiza umutimanama. Bashobora kwanga kwandika cyangwa gusoma ibisobanuro cyangwa inyandiko zerekana umurongo wa politiki w'ikinyamakuru mu gihe binyuranye n'amategeko agenga umwuga; cyangwa kwanga kugenzura inyandiko, ibiganiro binyura kuri radiyo, televiziyo, cyangwa bishyirwa kuri internet, cyangwa kwanga gufasha bagenzi be gutangariza hamwe inyandiko iyi n'iyi mu gihe byaba bishingiye ku mpamu zivuguruzanya n'amabwiriza agenga umwuga.

Uku kwanga gukora ibi ntibishobora gutuma umunyamakuru yirukanwa, kandi biramatse bibaye, Abanyamakuru bifatanya nawe kwamagana ako karengane.

INGINGO YA 24: Kurengera umunyamakuru

Hashingiwe ku mwuga we wihariye, umunyamakuru, aho ari hose mu gihugu agomba kugira uburenganzira busesuye ku mutekano we uw'ibikoresho bye, ku kurengerwa n'amategeko no ku iyubahirizwa ry'agaciro ke nta mananiza nta n'ibibanje gusabwa.

INGINGO YA 25: Kutavuga aho inkuru yaturutse

Umunyamakuru afite uburenganzira bwo kutavuga aho yakuye inkuru.

Umunyamakuru cyangwa igitangazamakuru ntibashobora gushyirwaho iterabwoba, kuko banze gutangaza aho bakuye inkuru.

INGINGO YA 26: inshingano yo kugisha inama

Abagize itsinda ry'ubwanditsi/gutangaza amakuru bagomba byanze bikunze kumenyeshwa icyemezo icyo aricyo cyose cy'ingenzi gishobora kugira ingaruka ku buzima bw'ikigo.

Bagomba nibura kugishwa inama, mbere yo gufata icyemezo ntakuka, ku byerekeye umwanzuro ukora ku bagize itsinda ry'ubwanditsi: guha akazi umunyamakuru, kumwirukana, kumwimirira ahandi no kumuzamura mu ntera.

INGINGO YA 27: Amasezerano n'igihembo

Kubera umurimo n'inshingano bye, buri munyamakuru afite uburenganzira ku byiza biteganywa n'amasezerano rusange no kubyo masezerano yihariye y'akazi amuteganyiriza, umutekano w'akazi n'umutuzo n'uburenganzira ku gihembo gihwanye n'uruhare rwe mu mibereho y'abaturage kandi gituma yihaza mu bukungu.

UMUTWE WA GATATU: GUSHYIRA MU BIKORWA INDANGAMYITWARIRE

INGINGO YA 28: Kunyuranya n'indangamyitwarire.

Kunyuranya n'iyi ndangamyitwarire bigenzurwa kandi bigasesengurwa na komite ngengamyitwarire ya Rwanda Media Commission (RMC) itorwa hashingiwe ku bushobozi bw'abayigize n'ubunyangamugayo bwabo mu gukemura ibibazo bivuka mu kutubahiriza iyi ndangamyitwarire.

INGINGO YA 29: Ibihano

Abanyamakuru n'ibitangazamakuru bitubahirije ibiteganywa n'iyi ndangamyitwarire bahabwa kimwe cyangwa urukomatanyo rw'ibihano bikurikira bigenwe na komite ndangamyitwarire: gutegekwa gusaba imbabazi, kwihanganganangirizwa mu magambo, kwihanganganangirizwa mu nyandiko, guhagarikwa by'agateganyo, gucibwa amande no guhagarikwa burundi mu mwuga w'itangazamakuru.

Guhagarikwa burundi mu mwuga w'itangazamakuru byemeza n'inama rusange.

INGINGO YA 30: ibirego byerekeye iyubahirizwa ry'indangamyitwarire

Umuntu wese, yemerewe gusaba komite ngengamyitwarire gusuzuma ukurengera kw'umunyamakuru n'igitangazamakuru hagendewe ku mahame ngengamyitwarire, hagafatwa umwanzuro kuri iki kirego.

Kujuririra ibi byemezo nabyo biremewe .

INGINGO YA 31: Uburenganzira bwo kwisobanura.

Umunyamakuru n'igitangazamakuru bakurikiranweho kutubahiriza aya mahame bagomba guhabwa umwanya wo kwisobanura imbere ya komisiyo mbere yuko bafatirwa ibihano.

Kujuririra ibi byemezo nabyo biremewe.

INGINGO YA 32: Gusobanura no gutangira gushyira mu bikorwa indangamyitwarire.

Iyi ndangamyitwarire itangira gukurikizwa imaze kwemeza n'inama rusange y'abanyamakuru yahamagajwe kubera iyo mpamvu gusa.

INGINGO YA 33: ibyerekeye ivugururwa ry'iyi ndangamyitwarire

Ivugurura iryo ari ryo ryose kuri iyi ndangamyitwarire rishobora gukorwa gusa mu nama rusange y'abanyamakuru, nyuma y'uko risabwe kandi integuro yaryo ikagezwa ku buyobozi bw'urwego rw'abanyamakuru bigenzura mbere y'uko inama rusange iterana.

INGINGO YA 34: Ivanwaho ry'amahame ndangamyitwarire abanziriza aya

Amahame ndangamyitwarire agenga abanyamakuru, n'abandi banyamwuga b'itangazamakuru n'umwuga w'itangazamakuru mu Rwanda yo muri kamena 2011 n'ingingo zose z'amahame ndangamyitwarire abanziriza kandi anyuranye n'aya bivanyweho.